

CONVENIO DE COLABORACIÓN ENTRE A AXENCIA GALEGA DAS INDUSTRIAS CULTURAIS E A ASOCIACIÓN GALEGA DE EMPRESAS DE ARTES ESCÉNICAS (ESCENA GALEGA) PARA A REALIZACIÓN CONXUNTA DE ACTIVIDADES DE FORMACIÓN E CAPACITACIÓN PROFESIONAL E DE PROMOCIÓN NO EIDO ESCÉNICO

MEMORIA XUSTIFICATIVA

*O director da Axencia Galega de Industrias Culturais (Agadic) **DECLARA:***

Que a *Axencia Galega de Industrias Culturais (Agadic)* ten previsto formalizar coa **Asociación Galega de Empresas de Artes Escénicas (Escena Galega)** o instrumento convencional arriba referido por un período de vixencia que abrangue dende **a data de sinatura ata o 15 de decembro de 2020.**

Que o instrumento convencional ten por obxecto:

O obxecto deste convenio é a realización de actividades de formación e capacitación profesional e de promoción no eido escénico a través do desenvolvemento dun plan de formación continua e consultoría profesional, con accións formativas centradas nas normativas estatais aplicadas ás artes escénicas e nas diferentes liñas de axudas públicas, así como en cuestións de carácter máis técnico que axuden no funcionamento das empresas e na implementación de protocolos e medidas de prevención hixiénico-sanitarios e adaptación de protocolos de riscos laborais dentro da actividade escénica profesional. Complementase este plan de formación co reforzo do labor de consultoría e asesoramento profesional nos eidos fiscal, laboral e legal; así como o desenvolvemento de actividades de promoción da actividade profesional centrada na volta aos espazos escénicos e na recuperación da confianza dos públicos no feito escénico como ambiente seguro.

Que o instrumento convencional que se pretende asinar fundaméntase no seguinte:

Escena Galega, atendendo aos seus fins, vén promovendo de forma continuada un programa de actividades e servizos de carácter colectivo e asistencial así como de fomento de todo tipo de iniciativas que redundan na defensa e potenciación das artes escénicas, e que se concretan nas actividades que leva a cabo para a promoción e visibilización do tecido profesional da escena galega coa asistencia á feiras e mercados de carácter estratéxico así como coa formación, mellora profesional e asistencia ás empresas asociadas e desenvolvemento de encontros e xornadas profesionais.

A crise provocada pola COVID-19 está a producir desafíos sen precedentes en todo o sector cultural, polo que é vital seguir mantendo o contacto e as sinerxías globais de cara a seguir impulsando a recuperación da actividade. Malia a parálise obrigada sufrida, aproveitar este momento de cambio como unha oportunidade de mellora na eficiencia no funcionamento das empresas pode resultar necesario. Neste sentido, o reforzo



nas propostas de formación e capacitación profesional no eido escénico nun contexto profesional incerto, así como os programas de asesoramento e consultoría, pódense converter en ferramentas de axuda para as empresas, que precisarán máis que nunca de accións de capacitación e seguimento para o mantemento, adaptación e viabilidade das súas estruturas ao novo contexto económico.

Insírese esta colaboración na medida 10 do "Plan de reactivación dos sectores cultural e turístico fronte aos efectos derivados da COVID-19", aprobado en Consello da Xunta o 30 abril de 2020, no marco do eixe de actuación da formación, profesionalización e mellora da competitividade e capacitación profesional no eido cultural.

O esforzo no fomento do sector escénico que realiza a Asociación tanto a nivel representativo como de dinamización e promoción coincide plenamente coas liñas de traballo da Agadic no que atinxe ao impulso da cooperación e do asociacionismo nos distintos sectores culturais, así como no establecemento de medidas para aumentar a presenza nos mercados culturais, e de apoio aos procesos formativos, de aí que considere fundamental o apoio, a través da colaboración mutua, a este tipo de iniciativas, establecendo accións conxuntas coa Asociación que permitan a súa participación no desenvolvemento deste proxecto.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, de 8 de novembro, de Contratos do Sector Público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria en Santiago de Compostela.

